




Mista Paiale Elo, M.P.



Mista Patterson Lowa, M.P.



Mista Manasseh Voeto, M.P.

Mista Mahuru Rarua Rarua, M.P.



**BAI
OL WINIM
ILEKSEN
GEN O
NOGAT ?**


Poto long raithan i soim wanpela man bilong ples Ambokon long Is Sepik. Em i Mista Melchior Mick Krawere. Hia em i sindaun lainim pasin bilong ranim wanpela bikpela masin i save mekim olkain wok wantaim namba. Nem bilong dispela masin em i kompyuta. Melchior i save work long Pablik Yutiliti dipatmen long Lae.



Tupela poto hia i kam long Australian Information Service. Poto antap em Mista John Tanner i kisim. Poto daunbilo em Mista Jim Fitzpatrick i kisim.

Poto i stap long daunbilo tu i soim gen wanpela man bilong Is Sepik Provins, Mista Johnny Kablijambi, bilong ples Wingei long Maprik Sab Provins, wantaim namba tu trening ofisa bilong Ovasis Telekomyunikesen Komisen, long wanpela bikpela haus telipon long Sydney, Australia.

Em i wanpela greduet bilong UPNG, na nau Johnny i wok long Intenesenel Telekomyunikesen Divisen wantaim Dipatmen bilong Pablik Yutiliti o Postal na Telekomyunikesen Sevis long Port Moresby.



wantok
Newspaper of Papua New Guinea

Papua New Guineans' own national weekly in Melanesian Pidgin

Editorial Office:

Box 1982
 Boroko

Phone : 25.2214
 Telex : NE 22213

Branch Offices:

Box 396
 Wewak
 Phone: 86.2479

Box 90
 Rabaul
 Phone: 92.1355

Box 111
 Wabag

Australian Advertising Representative:

Kevin Engel
 8 Duraba Pl.
 Caringbah (2229)
 Phone: 525.6263

Subscription rate:

Annual: K8.00



TRI I SKULIM KANTRI

Wanpela lapun saveman bilong kantri Thailan long Esia, nem bilong em Mang Igui, i stori olsem long mipela.

Wanpela kantri na ol pipel bilong en i olsem wanpela tri. Tri i gat planti hap bilong en. Planti pipel i save lukim tasol ol grinpela lip bilong tri, ol strongpela han, bikpela stik bilong en, ol naispela plaua na switpela kaikai.

Ol dispela hap bilong tri i makim ol bikpela pipel yumi save lukim long wanpela kantri. Em ol bikpela man bilong gavman, bilong politik, bilong sios. Em ol bikpela saveman, olsem ol tisa na dokta na bisnisman, man i pasim waitpela siot na trausis, meri i bilas olsem misis tru. Ol dispela pipel i ting ol i bikpela samting, ol i bun tru bilong kantri. Dispela i tru o nogat?

Sapos yumi yet i lukim tri, yumi save pinis ol rop i nambawan samting tru bilong en. Em ol rop i hait i stap aninit long graun. Em ol rop i karamap long graun i doti, i malumalu, i gat wara.


Maski sapos yumi katim ol han bilong diwai, na sapos yumi rausim olgeta lip bilong em, na tekewe olgeta plaua na kaikai bilong em. Em i samting nating. Em bai wokim nupela gen.

Tasol sapos yumi brukim graun na katim ol rop bilong diwai, bai em i dai.

Ol pipel nating, ol manmeri bilong ples, ol fama ol i olsem ol rop bilong diwai. Ol i rop bilong kantri. Sapos yumi laik bai kantri na nesen i kamap strong, orait, yumi mas strongim ol fama.

Sapos ol fama i rabis na i no sindaun gut, kantri o nesen i no inap kamap gut na kamap bikpela. Maski long ol biktaun bilong em, maski long ol bikpela haus i go antap inap long klaut. We stap fama? Sapos fama i no gat strong, orait, kantri tu i no gat strong. Maski long ol haiwe i gat kolta, maski long ol haus i gat pos ain na plua simen. Sapos ol fama i bagarap na i krungut i stap, kantri na ol pipel bilong en i no fri. Olgeta mauswara na hambak na bilas na wokabaut mas wantaim musik long independens de, em i sutim graun nating.

(Dispela liklik stori mipela i bin painim long wanpela nupela buk namba 116 bilong lain IDEAS AND ACTION. Em i kam long FAO, em dipatmen bilong kaikai na egriklsa bilong Yunaitet Nesens. Mipela i tenkyu long ol na long man i raitim stori.)



SOMARE LONG YUNAITET NESENS

Long 11 Oktoba, Praim Minista Somare i bin toktok long namba 32 jeneral asembli bilong Yunaitet Nesens long biktaun New York long kantri Amerika. Long dispela taim i gat 146 memba bilong Yunaitet Nesens i sindaun harim tok bilong Mista Somare.

Em i givim tok bikos em i nupela praim minista bilong Papua Niugini. Olgeta taim wanpela memba kantri i gat nupela het bilong gavman, ol i singautim em long sanap givimaut toktok na ol tingting na aidia bilong nupela gavman bilong em long olgeta memba kantri.

Em hia sampela aidia Mista Somare i bin autim: ting, na mipela i bel nogut long en.

Lo Bilong Biksolwara:

Gavman bilong mipela Papua Niugini i bel nogut long lukim namba tri miting bilong Yunaitet Nesens Konpres bilong lo bilong biksolwara i no bin stretim tok yet long dispela samting.

Olsem na Papua Niugini i bin kibung wantaim ol arapela kantri wansolwara na mipela yet i bin wokim lo long baim olgeta solwara inap long 200 mail long nambis bilong mipela. Em i bilong mipela stret. Na olgeta pis samting insait long en, i bilong mipela. Sapos arapela kantri i laik kam insait painim pis, orait, em i mas kisim tok orait long mipela pastaim. Inap nau i no gat wanpela bikpela lo bilong olgeta kantri long dispela sam-


Long wanem mipela olgeta i smolpela kantri tasol. Na mipela i no laik ol bikpela kantri i kam insait wantaim ol bikpela kampani bilong ol na pinisim olgeta pis bilong mipela. Pis em i wanpela bikpela samting mipela i gat long kaikai na long wokim bisnis wantaim ol arapela kantri.

Mipela olgeta smolpela kantri bilong biksolwara Pasifik i save bung wantaim na i wok wantaim. Mipela i gat Saut Pasifik Komisin long dispela, na Saut Pasifik Forum.

Pasin independens

Mipela Papua Niugini i belgut long lukim ailan klostu long mipela, em Solomon Ailan, bai kisim in-

dependens long 1978. Mipela i hop ol arapela kantri long Saut Pasifik na ol arapela kantri long graun



bai kisim independens bilong ol.

Mipela i wari na i bel nogut long pasin insait long Rhodesia. Mipela i sapotim wok bilong Amerika na Englan long helpim ol bikpela lain blakskin i no ken aninit moa long pawa bilong smolpela lain wait- (i go moa long pes 18)

4-pela ileksen paul

Ol ileksen bilong 4-pela ilektoret i bin paul na kamap inap long bik kot bilong Papua Niugini. Em bilong Menyamya Open, Port Moresby Not Is, Koroba-Lake Kopiago, na Port Moresby Not Wes.

Long Menyamya Open, wanpela namba bilong bipo em Mista Manasseh Voeto i bin winim ileksen gen wantaim 5091 vot. Tasol wanpela man i lusim, em Mista Neville Bourne, i bin kotim em long namba wan Jastis na i tok olsem, Mista Voeto i bin pretim ol pipel na trikim na giamanim ol na olsem tasol em i bin win. Em i tokim kot olsem, insait long wanpela pati Mista Voeto i bin tokim ol pipel, sapos ol i no vot long em, bai wan wan i kalabus o mas baim kot long K200. Namba wan jastis Sir Sydney Frost i bin traim dispela tok na i bin painim em i tru long tingting bilong em, na i bin helpim Voeto planti long ileksen.

Olsem na Jastis Frost i tok olsem i mas gat nupela

ileksen long Menyamya Open. Em i tekewe namba bilong Mista Voeto.

Long Port Moresby Not Is, Dokta Goasa Damena i kirap na bringim wari bilong em long bik kot egens long Mista Patterson Lowa. Mista Lowa i winim ileksen pinis na i bin kamap minista bilong ol plisman. Dokta Damena i tokim kot olsem, Mista Lowa i no inap resis long ileksen long dispela hap bilong Port Moresby bikos em i no bin sindaun inap tu yia stret long dispela hap. Em i lo bilong ileksen.

Inap nau ol loman i helpim Mista Lowa i no inap sakim dispela tok; olsem ating bai i mas gat narapela ileksen long dispela hap tu. Mista Patterson Lowa em i

bilong Pangu Pati na i wanpela lida bilong em nabaut long Port Moresby.

Long Koroba-Lake Kopiago Ilektoret wanpela memba bilong bipo, em Mista Andrew Wabiria, i bin kotim man i winim ileksen, em Mista Payali Elo na i tokim bik kot olsem, dispela Mista Elo tu i bin pretim ol man na tokim ol, sapos ol i no votim em bai ol inap kalabus o baim kot inap K200. Em i bin tok tu olsem. Mista Elo i bin krungutim gutnem bilong em long 4-pela maket.

Mista Jastis Pritchard i no bilipim dispela las tok. Tasol em i pilim i mas gat narapela ileksen bai olgeta pipel i ken save, ol i fri tru long votim husat ol i laik- (i go moa long pes 18)

PAS I KAM LONG OL PIPEL

WANTOK MP LUKIM

Dia Edita - Mi laik mekim sampela toktok i go long ol memba bilong Palamen. Taim ol i go long miting long haus (Palamen) na taim ol i kam bek long provins bilong ol yet ol i no goaut long ol viles na toktok, long wanem samting ol i toktok long palamen. Na kisim wanem kain taim bilong ileksen i kamap. Em bai ol i goaut na grisim ol pipel long votim ol.

Na taim nating ol i no save i goaut liklik long ol viles na toktok long ol pipel long kisim wanem wari ol i gat na go toktok long palamen.

Ating em tasol liklik toktok bilong mi. Sapos husat memba i pilim i no tru, orait, rait tasol i go long Wantok Niuspepa na bai mi ken ritim. Tenkyu.

Sakarias Henky,
Turinghi/E.S'P.

PAULIM TIKET

Dia Edita - Mi i gat wari long Maun Hagen Maket. Ol lapun manmeri i save salim kaikai long maket. Tasol man i save wok long

salim tiket i save mekim bikpela stil tru.

Bikpela kaikai na sampela liklik kaikai. Tasol ol lapun ol i save paulim tiket na i givim 30 toea tiket. Ol i save givim 10 toea tasol na givim 30 toea tiket na 20 toea. Ol yet i kisim sampela.

Wan kina tiket tasol 60 toea tiket na 4- toea ol yes. Na mi lukim oltaim bikpela stil i save kamap long ol man i save wok long Maun Hagen taun maket. Mi lukim tasol mi sori long ol lapun manmeri.

Yupa Kunjip,
Maun Hagen.

MI LAIK ASKIM YU

Dia Edita - Mi laik autim wari bilong mi. Nau mi ritim Wantok Niuspepa na mi lukim brata hia Jack T. Kotogani bilong Henganofi long Isten Hailans Provins. Yu toktok long maritmeri i mekim pasin pamuk. Wantok yu lukim maritmeri i pamuk?

Askim bilong mi i go olsem:

- (1) Wantok yu stap long ples o long bus?
- (2) Yu gat Mejistret, Kaun-

sil, Plis Stesin, o nogat?
(3) Yu save go lotu na harim gutnius o nogat?

Wantok sapos yu lukim maritmeri i pamuk long pilai kat. Yu no ken wari na rait i go long Wantok Niuspepa, na toktok planti.

Ol Papua Niugini maritmeri i no save mekim pasin olsem, yu tok. Yu lukim pasin olsem i kamap, orait, yu mas go na lukim man bilong meri ya.

Yu gat bos long ples bilong yu na go toktok wantaim em. Na putim meri stret long lo. Yu no ken semim maritmeri bilong P.N.G.

Yu lukim maritmeri long ples bilong yu em i pamuk, yu mas tokim kaunsil bilong yu long Henganofi. Em tasol.

Gregory J. Garasay,
Maprik/E.S.P.

YU NO LAIKIM TAMBUIM BUAJ

Dia Edita - Mi gat wanpela wari olsem. Wari bilong mi i go olsem: Yes olsem wanem long ol taun ol i bin putim rabis dram o tin long ples bilong maket na long rot tu.

Yes i gat ples bilong putim rabis o spet long en tu. Olsem wanem na ol i bin tambuim long kaikai buai insait long maket na ol kain ples olsem we i gat dram bilong tromoi o spet long en, long taim ol man i kaikai buai na spet long dram o rabis.

Watpo kaunsil i bin putim ol rul o lo insait long taun. Yes kaunsil, yu bin kisim pinis ol sampela boi long lukautim taun?

Orait sapos yu tambuim ol manmeri long kaikai buai na tambuim ol long spet nabaut long rabis, orait, tambuim tasol buai long maket tu. Ol i no ken putim buai moa insait long maket.

Sori taun kaunsil yumi lukluk raun gut pastaim. Em i Papua Niugini kastam

bilong yumi? O God yet i bin wokim yumi manmeri na ol animal na ol tri na ol kokonas na ol buai. Yumi ken kaikai buai na spet stret long rabis.

Yu no laik maski tambuim buai tasol long maket. Tenkyu. Yu husat man o meri yu laik helpim mi o bekim, orait, rait tasol long Wantok Niuspepa na bai mi ken lukim. Tenkyu. Welkam tasol long pas.

Augustine I. Dapani,
Tangu Viles/Madang.

ASKIM OL WANSKUL

Dia Edita - Mi no klia long wanpela pasin i stap hia long sios wokman trening skul long Heldsbach long Finschhafen. Mi askim yupela sampela skul tu ol i save mekim olsem o nogat?

Insait long Papua Niugini i gat kain kain skul. Ol dispela kain kain skul ol i save mekim wankain pasin o mi no klia. Olsem na mi askim sampela skul i ken bekim askim bilong mi.

Long hia long Heldsbach Sios Wokman Trening Skul tisa i save mekim kain pasin olsem long taim bilong Independens de long 16 Septemba.

Ol Independens Komiti bilong Gagidu ol i bin salim program bilong independens de i kam pinis long ol tisa. Tasol olgeta tisa ol i no redim wanpela program bilong Independens de. Nogat. Ol i stap olsem longlong man na bihain tingting bilong wanpela man i tok. Olgeta sumatin i mas i go lukim Independens de long Gagidu.

Ol i tok olsem na mipela i harim dispela tok. Na bihain ol i tok gen na i brukim ol sumatin na sampela i go long Gagidu. Na sampela i stap long Heldsbach.

Tasol sampela mipela i go long Gagidu mipela i no gat konset samting. Tasol mipela i go raun na lukim pilai. Tasol ol kain kain pilai ol i bin statim pinis long 14 na 15. Na long 16 i gat lotu tasol na spot tu.

Mipela i lukim ol dispela pinis na apinun mipela i go bek long Heldsbach. Na Mipela i go tok amamas long ol tisa. Na ol i lukim pes bilong mipela na pes bilong ol ya i drai tru long lukim mipela.

Na tu ol sampela sumatin i stap wantaim ol tisa ol i bin kukim kaikai long mes na ol i mekim bikpela amamas na i stap. Mipela ol manmeri i go raun long Gagidu na i kam long en, mipela yet i go nabaut long gaden bilong mipela yet na kisim kaikai i kam na kuk.

Na long nait ol lain manmeri i stap long Heldsbach ol i mekim bikpela singsing na mipela i lukim tasol mipela ol manmeri i go raun na i kam long en tu mipela i singsing wantaim ol.

Tasol bilong wanem na ol tisa i brukim mipela i kamap tupela lain? As i olsem ol tisa i tok long bai mipela i givim K90 long yupela ol sumatin. Na yupela i kaikai long dispela mani na pilai long hia. Tasol yupela i no ken i go long Gagidu.

Ol i tok olsem na sampela studen ol i tok. Nogat. Gavman i no komiti bilong Independens de. Em i no makim long hia.

I kam inap nau. Ating ol arapela sios skul tu ol i save mekim o nogat. Olsem na mi askim sampela skul.


Helsdbach Sumatin,
Heldsbach/Morobe Provins

MIPELA SORI TRU

Long Wantok bilong 15 Oktoba, namba 192, mipela i bin mekim bikpela asua.

Olgeta tok i stap insait long het stori, nem bilong em ROT BILONG BISNIS, em Mista Pita Lus, Minista bilong Bisnis i bin autim. Mipela i lusim ting long tokim ol rida dispela samting. Mipela i sori tru long papa bilong stori, em Mista Pita Lus, M.P.





NIUS BILONG OL MERI

SOLOMON AILANS MERI MITING



Misis Tamo Diro na Misis Kila Amini bilong Papua Niugini i bin go bilong mekim dispela kantri insait long bikpela kibung bilong 40 meri long Solomon Ailans.

Misis Diro em i bilong dipatmen bilong praim minista stret long PNG. Na Misis Amini em i nesanel eksekutiv dairekta bilong YWCA insait long dispela kantri.

Nem bilong dispela kibung long Solomon Ailans em "Wik bilong ol Meri". Na opis bilong minista bilong helt na welfe i bin wokim.

Sampela arapela pipel i gat biknem i bin tok long dispela miting em long Mis Patce Kauroa bilong Fiji na Dokta Spens bilong ministri bilong ovasis developmen long Englan.

Misis Amini i bin stori long ol Solomon deliget meri long wok bilong YWCA na olsem wanem em i save helpim ol meri bilong PNG.

Misis Diro i bin soim olsem wanem gavman

bilong mipela i yusim ol meri long mekim go het kantri bilong mipela. Em i toktok long namba 7 hap bilong Et Poin Plen. Em dispela hap i tok, ol meri i gat wankain rait olsem ol man long PNG. Em i soim tu wok bilong Nesanel Kaunsil bilong Ol Meri long PNG. Wapela bikpela wok bilong dispela kaunsil, Misis Diro i tok, em hia: ol meri i ken bungim ol tingting bilong ol wantaim, na ol i ken tokaut olsem strongpela grup i gat wanpela maus tasol. Olsem bai ol i strong.

Misis Diro na Misis Amini i belgut long lukim wok bilong ol meri long Solomon Ailans. Na tupela yet i makim gut dispela kantri.

I luk olsem i gat plant kantri nabaut long Papua Niugini, em ol wansolwara yet, i no save tumas long dispela kantri na ol pipel bilong em. Ol i no save mipela i bin winim ol long kisim independens, na mipela i pipel i bin kalap i go antap hariap moa. Planti ol i tingting yet long ol stori ol i bin harim long ol pasin tumbuna bilong mipela long taim bipo... ating bipo long Jemantaim yet.

Poto antap i soim grup kain kain meri i bin kibung long Solomon Ailans.

Long arapela poto, meri i stap long namba tu ples long lephan, em Misis Tamo Diro; Misis Kila Amini i stap long raithan tru.


minista meri

Nau i gat tupela minista meri long Isten Hailans Provinsal Asembli.

Misis Ruth Rokam i bin winim ol vot long kisim ples na wok bilong Provinsal Ministri bilong Helt insait long Isten Hailans. Em i kisim ples bilong Mista Sunuku Krokie, em wan-

pela Pangu Sapota, i bin winim ileksen bilong kamap memba bilong palamen bilong Henganofi Open Ilektoret.

Narapela memba meri bilong Isten Hailans provinsal gavman, em Mis Lotu Makai. Em i minista bilong ol wok wantaim ol meri.



PREN BILONG YU INAP OLTAIM



WARI LONG WOK BILONG OL PAIAMAN

Mista Gabriel Bakani, Minista bilong ol Pablik Yutiliti, em i bin wokim wanpela spesel komiti long glasim gut na givim gutpela aidia na tingting long stret-im sampela wari bilong dipatmen bilong paitim paia insait long ol taun

long Papua Niugini.

Ol memba bilong dispela komiti bai raun long ol taun olsem Moresby, Hagen, Madang, Lae, Rabaul, na Wewak. Ol i wari long wanem insait long las 3-pela mun i bin

gat sampela bikpela paia insait long Moresby na Hagen na Madang na Rabaul. . . . na ol paia-trak i no bin ran gut, na ol man i hatwok long painim wara bilong mekim dai paia, na tu pasin bilong singaut long paia

i no ran gut tumas.

Insait long dispela komiti i gat memba bilong ol paiaman, na pablik sevis komisin, na ol plisman, na dipatmen bilong ol balus na tu bilong transport.

Poto antap i soim tupela paiaman long Wariman em i wanpela ples klostu long Wewak. Ol paiaman i bin ran i go helpim famili, haus bilong ol i paia. Dispela poto em i bilong Januarius Sami.

TOYOTA

**TOYOTA TRAK.
TUPELA KAIN...
SOTPELA NA
LONGPELA**

**TUPELA WANTAIM I NAMBA-
WAN LONG KARIM KAGO,
PASINDIA, NA RAUN-RAUN
TU !**



K3500

K3300

ELA MOTORS LIMITED

PORT MORESBY
P.O. Box 75
Tel 25 4088

LAE
P.O. Box 91
Tel 42 1568

RABAU
P.O. Box 712
Tel 92 1988

KIETA
P.O. Box 468
Tel 95 6083

MADANG
P.O. Box 110
Tel 82 2188

MT. HAGEN
P.O. Box 93
Tel 52 1888


WEWAK
P.O. Box 581
Tel 86 2255

KAUKAU - RAIS FAKTORI I PAS

Gavman koporesen bilong bringim nupela kaikai long maket i pasim pinis faktori bilong em long Goroka. Hia ol i save wokim kaukau rais. Em i olsem ol i mekim drai ol kaukau na brukbrukim liklik liklik na i kamap olsem plaua, na ol pipel inap yusim long olkain nupela we.

Mista Karo Vali, provin-sal rural developmen ofisa, i tok olsem, ol i bin statim dispela faktori long mun Epril tasol nau ol i pasim gen.

As bilong em i prais bilong kaukau dispela faktori i save givim em i daun-bilo tumas na olsem ol pipel i no laik bringim moa. Faktori i bin givim 3 toea long kilogram kaukau. Bihain em i apim prais inap long 10 toea long wan kilogram. Tasol ol pipel i ken go long bikmaket long Goroka na salim long samting olsem 30 toea long wan kilo.



5-pela didiman go stadi long Indonesia

Mis Eurlia Paine i bin ripotim na raitim dispela stori.

Poto long lephan i soim Mista Kanai.

Wanpela staf memba bilong Banz Yangpela Didiman Skul, Mista Kamandong Kanai, wantaim 4-pela arapela wanwok bilong em long Yangpela Didiman Skul na Banz Egrikalsa Skul, long Westen Hailans Provins, i bin lusim PNG long 4 Oktoba long go mekim 3 wik kos long wok didiman long biktaun bilong Indonesia, Djayapura. Mista Kanai i gat 23 krismas na em i bilong Saidor Distrik long Madang Provins.

Mista Kanai wantaim ol lain bilong em bai mekim planti lukluk raun long dispela kos bilong ol. Ol bai go lukim tu ol sampela didiman stesin long Irian Jaya na Indonesia. Lain ya ol i kolim Luteran Wol Federesen i bin baim i go i kam rot bilong ol dispela lain.

Ol 5-pela didiman ofisa hia bai kam bek long PNG long 26 Oktoba. Bihain bai ol i lainim ol viles pipel gut ol nupela isipela we na pasin bilong statim wok didiman na fama long hap bilong ol bai ol yet i kamap gutpela lida na papa tru long ol dispela kain bisnis na skruim i go het long olgeta ples long bihaintaim.

I kam inap nau, Yangpela Didiman Skul i save kisim tasol ol haiskul dropaut. Tasol nau em gavman i helpim ol dispela lain dropaut na skul i no moa kisim ol. Nogat. Bai ol i stat nau long kisim ol man long ples stret long givim olkain trening long mekim dispela wok.


Yangpela Didiman Skul i no save kisim wanpela helpim i kam long ausait. Nogat. Skul i sanap long lek bilong em yet na mekim olgeta wok long em yet olsem long baim ol wokmanameri. Baim kaikai bilong ol sumatin na ol bulmakau em ol i save lukautim long skul bilong ol ya.

Kamandong Kanai i bin go pinis long Wes Jemani na Filipin Ailan long mekim dispela wankain kos long 1974. Em i tokim wanpela ripota bilong Wantok Niuspepa olsem: Em na ol 4-pela pren bilong em bai ol i kam bek wantaim planti nupela aidia na we em ol pren na wantok bilong yumi ol Indonesia i save yusim insait long kantri bilong ol.

Infomesen Opis Poto



Poto antap i soim Minista bilong bosim olkain wok nius na tok save ol i kolim midia, em Mista Tom Koraea, i givim wanpela spesel independens medal long namba tu siaman bilong NBC Nesenel Brotkasting Komisn, em Mista Ovia Toua. Mista Toua i bin wok moa olsem 15 yia stret long brotkas na long bungim na raitim nius.

Man i sanap toktok long maikrofon em i Mista Coleman Moni bilong NBC, em i bosim dispela seremoni. Na long dispela taim i gat 22 pipel olgeta i bin kisim medal na setifiket.



NAMASU

P.O. Box 615
LAE
Ring: 42.4200
Kampani bilong yumi

NAMBawan TIN PIS



AITAPE RAIHU HAUS SIK

Mista S. Holland, deliget bilong Siau Kaunsil insait long bikpela kibung bilong olgeta Wes Sepik kaunsil i bin tok olsem, wok bilong Raihu haus sik long Aitape i pundaun nau.

Raihu Haus Sik em i bilong ol pipel i gat sik lepra, na Katolik Misin yet i lukautim,

Kaunsila Holland i tok olsem, haus sik ya i nogut tumas, olsem na ol sikman i ranawe long en. Em i ting mobeta Gavman i lukautim dispela haus sik, long wanem kaunsil i no inap moa long helpim dispela haus sik.

Provinsal Helt Ofisa bilong Wes Sepik, Dokta Kumbakonum Sbhas, i bekim tok olsem: Raihu Haus Sik em i wanpela nambawan haus sik long

Papua Niugini. Na Katolik Misin i mekim gutpela wok tru long lukautim.

Dokta Sbhas i tok tu olsem, Gavman i save givim ol marasin bilong sik lepra na misin yet i bosim olgeta wok bilong panim haus sik.

Dokta i tok, sapos Siau Kaunsil i gat wari long dispela haus sik, orait kaunsil i mas salim ol tok bilong en i go long Dairekta bilong Helt na long Pater bilong Katolik Misin long Aitape yet.

VANIMO I NO INAP KAMAP NESENEL PLES BALUS

Provinsal Komisina bilong Wes Sepik Provins, Mista Benson Gegeyo, i bin tokim konpres bilong Olgeta Kaunsil Wantaim olsem, Gavman i bin seni-


sim pinis ol tingting bilong en, olsem na Vanimo bai i no inap long kamap intanesenel ples balus.

Gavman i laik wokim Wewak i kamap olsem intanesenel ples balus. Tasol olgeta kaunsila i no laik na i askim Provinsal Atoriti long toktok gen wantaim Gavman.

NBC - VANIMO

Ol memba bilong Olgeta Kaunsil Wantaim long Wes Sepik, i laikim bai Nesenel Brotkasting Komisn i wokim redio stesin long hap bilong ol hariap.

Tasol man i makim NBC long Vanimo, Mista Joseph Gohan, i bin tokim ol kaunsila olsem, NBC i ting olsem bai ol i wokim redio stesin bilong Wes Sepik namel long 1978 na 1979 samting. Tasol ol kaunsila i no amamas tumas long dispela aida,



Ples bilong olgeta singsing resis long Wewak.

SINGSING RESIS

Long stat bilong mun Oktoba, Asosiesen bilong ol wokman o leiman bilong Katolik misin long Wewak, i bin putim wanpela singsing resis.

Siaman bilong dispela asosiesen, Bruder Jerry Warun, i tok i bin i gat 10-pela grup i resis long dispela bikpela bung.

Bruder Jerry i tok tu olsem, dispela resis ol i bin mekim kamap i bilong helpim ol long kisim mani long helpim lokal Katolik Sios long provins yet.

Bihain long dispela singsing resis wan wan prais i go long ol singsing grup em ol i bin i stap insait long dispela resis.

WEWAK SOSAL WELFE

Long mun Septemba, Komiti Bilong Sosal Welfe long Wewak i bin kibung. Em i tok i gat 4-pela bikpela wari long Wewak. Em hia: Pasin bilong dring spak, pasin pamuk, ol skul dropaut i raun nating long taun, na ol pipel i no gat wok.

Long namba tu miting bilong dispela Sosal Welfe Grup i bin ilektim wanpela het komiti na 4-pela arapela smolpela komiti bilong lukluk long ol dispela wari.


Primia bilong Is Sepik, Pater Kerubim Dambui, em Siaman bilong het Komiti. Provinsal Komyuniti Developmen Ofisa, Misis Mary Klink, em i mas ripot long pasin bilong spak.

Welfe Ofisa bilong Katolik Misin, Sista Pilar, bai i lukluk long dispela wari bilong pasin pamuk. Plis Komanda bilong Wewak, Chif Inspekta Alphons Krau, em i mas ripot long ol man i raun raun nating long taun na i no gat wok.

Arapela Welfe Ofisa bilong Katolik Misin, Mista George Smadu, em man bilong lukluk insait long wari bilong ol skul dropaut.

Pater Dambui i tok, em wantaim 4-pela arapela komiti bilong em bai holim miting long olgeta fotnait, na givim toksave i go long gavman na sios, na ol kampani long Wewak long ol tingting na aida ol i bin painim long kibung bilong ol.

THE HOME GUARD FLY TRAP



Han Tambu Bilong Pasim Ol Lang

Hangamapim dispela botol ausait long haus long ples klia. Marasin bilong em bai pulim ol lang. Ol i no inap go pas na kam insait long haus.

NUPELA SAMTING.
TRAIM. BAIM.

Mainland Plumbing Supplies Pty.Ltd.
Aircorps Road, P.O. Box 954
Lae Ring: 42.2633 42.4535




Hawain Bris

Long 4 Oktoba, Gavana Jeneral Sir Tore Lokoloko i bin opim nupela bris long Hawain Riva klostu long Wewak. Samting olsem 800 pipel i sambai long dispela selebresen.

Ol wokman i bin wok inap wan yia stret long sanapim nupela bris long Hawain, bihain long ol bikpela trak i bin brukim waia bilong bris bilong bipo. Tait i no bin brukim bris, olsem sampela niusman i tok. Nogat bipo i gat bikpela bris i hangamap long waia na ol waia i ros na bris i pundaun. Mipela bilong WANTOK niuspepa i putim hia sampela poto bilong soim dispela samting. Ol kos bilong nupela bris em i K130,000.

Sir Tore i tokim ol pipel olsem: Nau rot i op gen long ol pipel bilong But na Boikin na Dagua i ken bringim ol kopra na kakao na bulmakau bilong ol i kam long maket na long pasis bilong Wewak. Gavana Jeneral i tok olsem: i gut ol pipel yet i taitim bun pastaim na i wok bipo ol i askim provinsal o nesenel gavman i helpim ol.



Poto antap na long hapsait i soim olpela bris i brukim Hawain Riva. Tait i no kisim. Nogat. Rop bilong em i bruk na em i kapsait i pundaun long wara.

Nupela bris em i narakain na i no gat rop bilong olsem bipo.

Januarius Sami bipo em i bilong WANTOK, i kisim ol poto.

TOBA PTY. LTD.

Lae, Port Moresby

CANTER

TIPPER

T120 MINIBUS

T120 UTILITY



COLT T120 TRUCK


LANCER

MINICA

CELESTE

SIGMA

OL I HETMAN BILONG SALIM OL MITSUBISHI KA



SIR TEI ABAL NA AIR NIUGINI

Sir Tei Abal, Lida bilong Oposisen na bilong Yunaitet Pati, i bin tok amamas long Air Niugini i bin winim profitmani inap long K922,703.

Tasol Sir Tei i ting nau Air Niugini i mas yusim sâmpela dispela mani long mekim gut long ol pasindia i flai long ol balus bilong en. Namba wan, Air Niugini i no ken apim kos bilong tiket inap long Jun 1978.

Namba tu, Air Niugini i mas mekim moa samting bilong mekim gut long ol pasindia long ples balus na insait long balus. Em i ting Air Niugini i mas givim kaikai long olgeta pasindia insait long balus sapos ol i flai moa olsem tu aua. Na tu i mas givim brekpas long ol pasindia i flai bipo long 8 klok moningtaim.

Poto antap i soim Kepten John Regan, em i namba wan kepten bilong bikipela 4-ensin smokbalus bilong Air Niugini i save flai i go long Sydney na HongKong na Manila na Kagoshima long Japan.


Kepten Regan em i bilong Bellingen long Australia na em i stat long flai long balus long yia 1951. Namba wan em i skul long flai long tuwing balus ol i kolim "Tiger Moth". Bihain em i flaim kago long Rockhampton na i joinim Ansett-MAL long yia 1961 olsem ofisa bilong flai long DC3 long Papua Niugini. Bihain em i flai long Foka. Em i joinim nupela Air Niugini na i kamap namba wan bosman bilong olgeta pailot bilong ol Foka balus long PNG. Em i bin pinisim 18 mun skul wantaim Qantas long flaim bikipela 707 smokbalus. Em i flai pinis 16,000 aua olgeta.

Sir Tei i no laikim tru dispela pasin bilong tokim ol pasindia i laik flai, ol i mas wet pastaim. Sapos i gat spes, bai ol i ken flai.

BOROKO MOTORS



Tractors
Equipment



YU KEN LUKIM NUPELA FORD TRAKTA
LONG BOROKO MOTORS LONG OLGETA

HAP BILONG PAPUA NIUGINI na tu
long ARAWA MOTORS.



EM I WINIM OLGETA ARAPELA TRAKTA
INSAIT LONG PAPUA NIUGINI

***** PLANTI SPEA PAT

***** PLANTI MEKANIK



FOCUS

KONPRENS EGENS LONG APATHAIT.....

Long bikpela konprens long biktaun Lagos long kantri Nigeria long Afrika ol deliget i bin tokaut na vot egens dispela pasin bilong Sauth Afrika ol i kolim apathait. Apathait em i pasin bilong tambuim ol blakskin pipel long sindaun namel long ol waitskin na mekim wankain wok, na yusim sem skul na haus sik na hotel na maritim maritim waitskin sapos ol i laik.

Konprens ya i laik bai olgeta gavman i pinisim nau tasol pasin bilong salim olkain gan na katres na ol samting bilong pait long gavman bilong Saut Afrika. Na tu i tambu long givim atom bom long ol. Konprens i tok tu, Sekyuriti Kaunsil bilong Yunaitet Nesens i mas lukaut bai ol kantri i mas bihainim dispela tambu.

Ol deliget i laik bai ol kantri i mas tambuim olgeta wok bisnis wantaim Saut Afrika.

Las tok bilong konprens em hia: sapos yumi inap stretim dispela pasin long Saut Afrika long waitman i krungutim blakskin na i bosim em na i no givim vot long em na i putim planti tambu long em insait long kantri bilong em yet - sapos blakskin na waitskin i kamap wankain tru long ai bilong lo - na tupela wantaim i gat wankain vot - yumi winim bikpela samting tru na yumi inap kirapim gutpela rot tru bilong helpim sindaun bilong olgeta blakskin long graun.

RHODESIA

England na Amerika i laik bringim long Sekuriti Kaunsil dispela 4-pela aidia bilong stretim trabel insait long kantri Rhodesia:

- (1) Pawa bilong bosim Rhodesia i mas lusim han bilong liklik lain waitman na i go long han bilong bikpela lain lokal blakman.
- (2) Ol blakskin long Rhodesia i mas kisim independens long yia 1978 na i no mas gat pait na woa bilong kisim dispela.
- (3) Bihain, i mas gat fri ileksen na olgeta manmeri bilong olgeta kain kala i ken vot long dispela ileksen.
- (4) I mas gat wanpela kain lo tasol bilong olgeta kain pipel insait long kantri Rhodesia.

RIPOT LONG SAUT PASIFIK

Komiti bilong Yunaitet Nesens bilong lukaut bai ol man bilong wanpela kala skin i no ken krungutim ol man bilong narakain skin, i bin givim ripot bilong em long 7-pela kantri long bikwolwara Pasifik nabaut long Papua Niugini. Komiti i ripot olsem:

Long Tolekau Ailans - i gat tok long komyuniti developmen na ol haus bilong ol pipel. Na i laik Nu Silan (em kantri i lukautim yet dispela teritori) i mas givim wankain pe long ol lokal pablik seven olsem long ol pablik seven i kam long ol ausait kantri.

Long Gilbert Ailans - komiti i egens long aidia long kisim planti wokman i kam long ol ausait kantri long mekim wok bilong gavman na i no tingim ol loka pipel yet. Dispela kantri i sot long skul na wok edukesen bilong en i mas go het moa yet.

(I go moa long pes 18)

Long 19 Oktoba bai 4-pela nupela stem i kamaut na ol i gat kain kain mak i kam long ol Elema pipel nabaut long Kerema long Galp Provins.

Ol stori bilong ol tumbuna tru i hait insait long ol dispela mak..

Pastaim ol i wokim long stretpela hap plang ol i bin boinim long paia na i kamap blakpela. Bihain ol i katim kain kain mak insait na penim long ol pen bilong bus na graun i gat kala.



ol pablik sevan lainim motu


Samting olsem 20 pablik sevan na wokman bilong kain kain bisnis long Milne Bay Provins i skul inap long tri mun nau long lainim tok ples Motu.

Proviñsal Edukesen Ofisa bilong skulim ol bikpela manmeri em Mista Levi George, i tok em i mobeta ol pablik sevan long Alotau i mas save tok Motu bai ol inap toktok tru wantaim ol pipel. Ol pipel yet i laik bai ol ofisa na pablik sevan i toktok wantaim ol long tok Motu na i no long tok Inglis.

Mista Bobby Mea, wanpela tisa bilong Alotau Komyuniti Skul, i mekim dispela skul. Profesa Tom Dutton bilong Yunivesiti bilong Papua Niugini i givim ol buk long dispela kos.

Em i namba wan taim ol i traime kain samting olsem. Ol wokmanmeri i winim dispela kos bai kisim setifiket bilong en. Na sapos kos i ran gut, bai ol i mekim long ol arapela ples tu. Ating bai ol i mekim dispela kain kos long tok Pisin tu long planti hap bilong Papua Niugini, stat long Port Moresby yet.

Mista Mea i tok, ol dispela spesel sumatin bilong em i laikim dispela kos na i pilim em i helpim ol long wok bilong ol.




Yule Aperana Pty Ltd

**HIA YU KEN BAIM
OLKAIN PIS NA KINDAM SAMTING BILONG SOLWARA.
I GAT NUPELA
NA SAMPELA I BIN STAP LONG BOKIS AIS**

**YU KEN BAIM PLANTI O LIKLIK TASOL,
LONG LAIK BILONG YU.**

**MIPELA I STAP ARASAIT LONG HUBERT MURRAY PLES PILAI
LONG KONE DOBU
P.O. BOX 3703, PORT MORESBY.
PH: 21 4075: 21 1777**

MINISTA STATIM GADEN BILONG EM YET



Julius Chan, Minista bilong Praimeri Indastri, i ting yumi no mas tok-tok tasol. Nogat. Yumi mas givim gutpela eksampel na soim rot long ol arapela pipel, bai ol tu inap long bihainim.

Olsem na Mista Chan i bin statim wanpela liklik gaden nabaut long haus bilong em insait long Port Moresby yet. Em i laik soim ol arapela pipel, yumi inap groim kabis na tomato na sayor long taun yet.

Mista Chan i wari planti long wanem planti dispela kain kumu na sayor na grin samting, i save kam longwe long Port Moresby long balus yet. Watpo?

Yumi no mas wetim ol arapela man i kam helpim yumi. Nogat. Yumi mas amamas long sanap long lek bilong yumi yet na taitim bun na groim ol samting.


Mista Chan i tok: Mi save dispela liklik gaden em i samting nating tasol em i ken skulim mi. Mi no laik senisim planti samting wantaim. Mi laik yumi go het isi isi, groim gut wanpela samting, bihain gen, narapela.

Tasol olgeta manmeri i mas stat, i mas mekim liklik wok bilong em yet. Sapos yumi traim planti long planti ples, bai yumi lus.

SAPOS YU LAIKIM BATERI TRU YU BAIM DISPELA KAIN


KASET BILONG MAXELL

Em i namba wan tru



BATERI BILONG MAXELL

Em i save wok longpela taim tru



yu ken baim long :

HAGEMAYER (P.N.G.) PTY. LTD.

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O.Box 63, RABAU
PHONE: 922633

P.O.Box 90, LAE
PHONE: 423200

P.O. Box 11, MT' HAGEN

YUSIM MAN OLSEM KAMBANG

Wanpela yangpela meri em i sikmun na i stap long arere. Em i slip tulait long moningtaim, em i kirap na i go long bus. Na em i kamap long wanpela as bilong ton. Na em i lukim as bilong ton i gat sampela talinga na sampela mambu.

Nau em i tingting i go na em yet i askim em olsem: Em i samting bilong kaikai? Em i kisim mambu talinga pinis, na em i singautim i go long koki na tokim em olsem: Yu gutpela koki. Orait, yu ken katim sampela ton? I kam daun long mi.

Man, koki i harim olsem na koki i katim planti ton i go daun long meri. Em i kaikai sampela na karim sampela i go long ples. Em i stap kaikaim mambu talinga na ton i pinis. Em i no save em i kisim bilas bilong masalai. Mambu em i spia bilong em na talinga em i bilas bilong em.

I go apinun, em i go slip. Na masalai i kisim pes bilong man bilong em na i go insait long haus na slip wantaim em, na i go mek-

im olsem 3-pela nait. Na namba foa nait long en, em meri ya i kirap na kros long man bilong em. Na man bilong em i tok: A! I no mi.

Na em i was long nait na lukim wanpela man i go insait long haus. Na em man ya i pasim dua na em i kamap olsem wanpela draipela moran. Nau em i go. Tulait long moningtaim, man i askim meri bilong em olsem: Yu i go kisim ol samting long wanem hap? Na meri i tokim man bilong em olsem: Mi go kisim long dispela hap-ples.

Na man i tokim em: Yu inap stap long ples? Em i rong bilong yu. Em bambai yu i go na maritim masalai. Nau masalai i tokim ol olsem: Sapos mi maritim dispela meri, em i orait. Nogat ples i bagarap.

Orait, ol man bilong ples i harim i no stret. Nau ol i kilim wanpela pik na kukim pinis na ol i singautim em na masalai i kamap long ples na em tupela meri wantaim masalai, tupela i kaikai pik.



i kirap katim jaket ples i kam pundaun long dispela ples. Bihain, ol i kukim ston, na tromoi i go daun long wara. Nau wara i boil na ol i lukim snek moran.

Meri i kamap i go, ol i larim em. Na tasol em man i kamap, ol i kilim em na ol i kukim em. Bihain, em i kamap olsem kambang, na ol i salim long olgeta ples, na ol i karim i go. Dispela kambang ol i save yusim long yam na mami tasol. Dispela stori i kam long Kumphun. Nem bilong masalai em Miaka.

Mista Joris M.S.,
Arawa/N.S.P.

OL TANIMTOK

Mista Buri Kindu, man i senisim seketeri bilong jastis, i bin autim bikpela wari bilong nesenel kot. Ol i gat tupela tanimtok tasol. Long olgeta hap ausait long Moresby dispela kot i no inap wok gut sapos i no gat tanimtok.

Tasol wok bilong tanimtok i no gat gutpela pe. Na olsem sampela i ranawe pinis long dispela wok, na planti i no laik kisim. Nau ol i mas gat 10-pela tanimtok, tasol bai ol i painim we?

Pinis, masalai i kirap karim spia bilong em, na tupela i go daun long raunwara. Na em nau masalai i tokim meri olsem: Yu lukim wanpela koki? Em i lukluk i go antap na em i katim tupela susu bilong meri. Nau tupela sus i trip antap long wara, na tupela

i go daun long raunwara.

Na susa bilong meri em i sanap hait long tupela i stap. Em i karim wanpela spia tu. Nau em i sutim tupela susu bilong susa bilong em, na karim i go antap long ples, na ol i krai long tupela susu ya.

Taim ol i planim pinis, ol

STORI BILONG TULTUL TITAN



NAU EM TAIM BILONG REN
LONG HAP BILONG HAILENS.
OL KANDRE OL GAT TITAN
BANIS I NO GAT WARI
BIKOS WARANA I NO NAP
BRUKIM. TITAN BANIS BAI
SANAP STRONG. EM I NO OL-
SEM BANIS NATING.

Titan (NG) Pty Ltd. P.O. Box 25 Lae Ph 423988, 423497



SUNAM KONA

Manus Tingting Fran Pren - Birua

Moa long 50 pipel bin mas long Lorengau maket na i go long Eria Authority long givim wanpela hap pepa ol i kolim Petition. Ol lain bin mekim dispela mas em ol i kolim ol "Manus Tingting Fran o Manus Liberesen Fran."

Wanpela man i toktok makim dispela lain i bin tokim man i save raitim nius bilong Wantok olsem, ol i laikim ol Gavman Ofis na ofis insait long Eria Autoriti i mas klia long sia bilong ol, olsem wanpela man i ken bosim ples.

Em i go yet na i tok olsem nau ol ofisa i stap i save i stap pasim nating mani bilong Gavman. Dispela em i olsem ol mani Gavman i salim long mek-

im wok insait long provins i save i go insait long poket bilong Sinia Ofisa.

Provinsal Gavman, Mista Bernard Borok i bin tokim ol man i bin mas wokabaut olsem: Em i amamas i no gat pait samting i bin kamap long taim bilong mas. Em i go het na i tok em i rong liklik long mekim long taim bilong Independens de.

Ol pipel i bin stap long dispela mas i mas pinis long wok bilong em olsem Presiden bilong Interim Provinsal Gavman. Mista Papi Rashei i bin tok em i orait long pinis long wok bilong mi tasol. Mipela i mas lukim nupela ileksen bai kamap long yia 1978.

Wanpela kaunsila bilong ples Rossun insait long Manus Provins i no laikim tingting bilong Grup o Lain ol i kolim "Manus Tingting Fran." Man ya em Kaunsila James Kepo. Em i bin tok dispela kain tingting na tok politik em i bilong bagarapim gutpela sindaun bilong ol pipel bilong Manus Provins.

Kaunsila Kepo i bin tok olsem em i bin wok olsem kaunsila inap long planti yia wantaim Manus Lokal Gavman Kaunsil, na em i no bin lukim dispela kain lain bipo.

Em i go yet i tok dispela lain i mas i gat wanpela kain Fran o smapela mani pastaim long ol i ken statim dispela kain Grup o

Ogenaisesen olsem Kaunsila Kepo wanpela bikpela tingting bilong dispela lain em toktok i sakim tru, em long rausim ol hetman long ol wok bilong gavman olkain man olsem Provinsal Komisina, Mista Bernard Borok, Premia bilong Manus Interim Provinsal Gavman, Mista Papi Rashei na ol narapela hetman.

Em i go het na i tok, ol dispela man na wantaim tupela memba bilong Nesenel Palamen save toktok na pait strong na ol man i save kam insait long Manus Provins long developim dispela provins.

Kaunsila Kepo i go het na i tok, em olsem Kaunsila, em wantaim ol narapela kaunsila i gat pawa

long pait hat wantaim gavman long bringim mani i kam long provins long kirapim provins long ran gut.

Em i go yet na i tok dispela kain lain i gat planti toktok politik na dispela bai stapim developmen bilong provins.

Wanpela taun komiti bilong Lorengau Taun Kaunsil i tok em i no bin amamas tumas long lukim dispela demonstresen o mas wokabaut long 15 de bilong mun Septemba. Mista Kimat Pano em memba bilong taun komiti bilong Lorengau Taun Kaunsil, i tok olsem: olgeta pipel long Papua Niugini i bin redi long amamasim o selebretim Independens tasol dispela lain Manus Tingting Fran i laik bagarapim amamas bilong ol Manus pipel, →

K4. tasol SAMTING TRU..

bilong olgeta

tisa

laibreri

skul

Pulap long

- . poto
- . nius
- . stori tumbuna
- . ileksen nius
- . 500 pes olgeta

Hia em i K4 bilong mi. Yu salim Wantok buk i kam long mi.

NEM.

ADRES.

Salim i kam long: WANTOK
P.O. Box 1982
Boroko



SUNAM KONA


Mista Kimat Pano i go yet na i tok dispela Manus Tingting Fran i mekim dispela mas i soim olsem ol i no gat wanpela rispek long Gavman bilong P.N.G. Dispela lain i laik traim pulim sampela gutpela pipel em ol i gat wanbel wantaim Gavman.

Kimat Pano i tok em olsem wanpela taun komiti em i no laik lukim dispela kain mas ol i soim long ol narapela. Sapos ol i laikim dispela samting, ol mas kisim pas pastaim o tok save long plis na Provinsal Komisina pastaim long ol i ken mekim dispela demonstrestin o mas. Ol dispela kain ol ogainesen o lain sapos i kamap planti long Manus Provins, dispela bagarapim sindaun na developmen bilong Manus Provins.

WUVULU, AUA

Provinsal Namba bilong Palamen bilong Manus, Mista Michael Pondros i askim ol lida bilong Is Sepik na Manus Provins long toktok stret long givim Wuvulu na Aua ailan i go long wanpela long dispela tupela provins.

Mista Pondros i tok olsem, em i no amamas long toktok bilong Memba bilong Wewak Open, Mista



Mista Michael Pondros
(Manus Provinsal)

Tony Bais long kisim Wuvulu na Awa i go long sait bilong Is Sepik.

Mista Pondros i go yet na tok Mista Bais i no ken go long Nesenel Gavman na toktok long en. Em i mas bungim ol lida bilong tupela provins long toktok long dispela samting. Tony Bais i no laik stretim dispela samting taim em i Provinsal Komisina bilong Is Sepik, dispela ol toktok bilong em i grisim ol pipel long votim em long narapela bikpela ileksen i kam.

Mista Pondros i go yet na i tok em i sutim tok tu long Australian Gavman i no laik stretim gut dispela samting taim ol i wok long lukautim kantri bilong yumi.

Provinsal Namba bilong Palamen bilong Manus, Mista Michael Pondros i tokim wanpela ripota bilong Wantok olsem. Sapos dispela tupela provins ol lida i no stretim kwik bai i go moa toktok bai wok long kamap long tupela ailan ya. Wuvulu na Awa ailan. Em taim nau tupela provins, Is Sepik na Manus Provins i wok olsem wanpela tim.

YUT WOKSAP LONG WOREI

Moa long 200 yangpela manmeri i bin bung long ples Worei long Manus Provins i bin stap insait long wanpela kain kos long mun Ogas.

Komunyuniti Developmen Ofisa insait long Divisen bilong Sosal Developmen, Mista Ezekiel Papi Pawai i bin tok olsem, 7-pela ofisa bilong gavman dipatmen bilong Bisnis Developmen, Helt, Didiman, Infomesen, i bin stap insait long dispela kos.

Dispela kain kos i givim gutpela save long ol yangpela pipel long wanem samting tru ol gavman dipatmen insait long Manus Provins. Em i go yet i tok taim ol i kisim kos, ol dispela yangpela pipel i ken i go bek long ples long lainim ol komyuniti.

Mista Pawai i bin go het na i tok ol yangpela pipel bilong Worei, Tawi, Pitiret, Uldram na Drapitoy, i bin amamas long stap insait long dispela kos, long wanem ol i lain planti gutpela samting, em inap lainim ol komyuniti wok long ol ples insait long Manus Provins.

Mista Ezekiel Papi i bin tok olsem, dispela em i gutpela kos na bai i gat wanpela olsem long Not Kos long Manus.

**Olgeta ripot long dispela tupela pes i kam long WANTOK ripota long Manus, em i Mista Bob Augui
P.O. Box 107
Lorengau**

MASKI RAUSIM OL PIPEL

Taun komiti bilong Lorengau Taun, Mista Kimat Pano i bin tok olsem: em i no amamas long sampela kaunsila i tok olsem, ol i laik rausim ol pipel bilong narapela provins i stap long Manus Provins.

Dispela kain tingting i no stret long hap tok we gavman i save tok Yuniti o Bung Wantaim. Mista Pano i tok, i bin i gat sampela kaunsila i bin toktok olsem. Ol pipel bilong narapela provins i stap long Manus provins i mas klia long dispela provins. Mista Kimat Pano, taim em i bin kaunsila bilong Lorengau taun em i bin lukim olsem planti takis mani i kam long ol pipel bilong narapela provins em ol i stap long Manus Provins.

Sapos ol pipel long Manus Provins i laikim YUNITI ol i no ken mekim dispela kain pasin long rausim ol pipel bilong narapela provins. Mista Kimat Pano i tok em i go het na i tok, sapos em i kamap wanpela kaunsila, em bai pait hat long putim kem bilong Sepik, Morobe, Madang, Tolai na ol narapela provins.

NO GAT MANI NO GAT WARA

Wanpela Viles Lida na Viles Kot Mejistret, Mista Pokapin Pombulei bilong ples Rossun insait long Manus Provins i tok gavman i bin mauswara long givim sampela mani long yusim wara long graun bilong en.

Mista Pombulei i tok olsem, sapos gavman i no givim em sampela mani, em i papa bilong graun, em i gat olgeta pawa long stapim wara long dem we i save givim wara long Lorengau taun.

Mista Pokapin Pombulei i go yet na i tok. Gavman i bin stat long yusim wara long dem stat long yia 1945 i go inap long 1977. Gavman na em i bin sainim wanpela pepa long kisim mani bilong wara, em banis wara i stap long en. Tasol gavman i maswara tasol i no mekim wanpela samting long en.

Mista Pokapin Pombulei em i bin toktok wantaim Dipatmen bilong Graun, tasol nogat wanpela samting i bin kamap namel long en na Lens Dipatmen. Mista Pombulei tok em i givim 6-pela mun, long gavman long senisim tingting. Sapos nogat wanpela samting i kamap em bao go het long stapim wara long i no ken go long Lorengau taun.

Mista Pombulei i tok em i no laik mekim dispela long wanem Lorengau Haus sik i save yusim dispela wara i stap long banis wara. Em i papa long en.

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:.....

ADRES BILONG YU:.....

.....

Salim sek o mani oda inap long K8.00 wantaim dispela tiket i kam long:

**WANTOK
BOX 1982
BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.



PAS I KAM LONG OL PIPEL

MAMA I KARIM BIKPELA HEVI

Dia Edita - Mi laik bekim pas bilong brata yia Y. Stephen Joseph bilong Yangoru/E.S.P. long Wantok nius long 24 Septemba 1977. Yes brata tingting bilong yu i gutpela tru mi amamas, tasol mi tu mi wok long haus sik, na mi pilim tingting bilong yu i rong.

Ol M.C.H. nes na sista i no kros nating. Ol i laik helpim ol mama. Yu man i orait. Yu tingting tumas long slip wantaim meri. Tasol taim mama i gat bel, em i bikpela hevi tru.

Tu sapos mama i karim pikinini klostu klostu bai ol pikinini i no inap gro gut, na bai ol i bun nating. Long wanem pikinini i liklik yet na mama i rausim long givim susu. Em i redi long kisim arapela pikinini.

Narapela samting brata tingim bikpela mani bilong skul. Sapos yu laik wokim planti pikinini, yu inap baim skul bilong ol inap ol i kisim wok.

Brata mi gat arapela samting long tokim yu. Tasol bai nogut longpela pas tumas. Em tasol brata. Na tingim gut. Bikpela hevi mama i karim. Na no ken tingim yu tasol.

William M. Muru,
Vanimo.

NAMBISMAN YU MAS WAS AUT GUT TRU

Dia Edita - Mi wanpela boi bilong Okapa, insait long Isten Hailans Provins. Nau mi stap long Finschhafen Bois Vokesenel Senta. Mi laik autim wanpela liklik wari bilong mi olsem: Ol man bilong nambis ol i save daunim nem bilong Hailans. Na ol i tok long Hailans olsem, ol man bilong Hailans ol i gat bikpela pait i kamap olgeta taim na mekim planti kain kain pasin i stap em ol i tok olsem.

Tasol mipela i no olsem pik o dok na mipela i kilim man nating nating. Em mipela i olsem man. Em mipela i no olsem ol wail pik o wail dok na kilim man nating na putim insait nabaut nabaut long rabis ples na kaikaim ol. Em mipela i gat tingting na mipela i save i stap gut.

Tasol na sampela man bilong nambis tu em ol i tok olsem: Ol man bilong Hailans ol i gat haiden man tasol ol i stap em i tok olsem.

Tasol dispela man em i no save i go long hap bilong Hailans na lukim pasin bilong ulkautim sios na wantaim ol arapela samting. Em ol i save mekim tok giaman na pulim tok giaman na dispela em ol i laik daunim biknem bilong Hailans na mekim tok giaman tru tasol.

Na dispela kain pasin nogut na trabel i no save kamap long ol manmeri bilong ples. Nogat. Em ol man bilong taun na raskal tasol ol i save mekim dispela kain trabel i save i kamap long Hailans. Em i no ol man bilong ples ol i mekim trabel i kamap olgeta taim long ples bilong ol.

Em dispela kain trabel i save kamap long ol man bilong taun tasol. I no ol man bilong ples ol i mekim na ol man bilong nambis ol i save pulim tok giaman i go i kam na daunim nem bilong mipela long Hailans.

Na ol man bilong Hailans tu sampela ol i gat kristen man i stap tu. I no nambis tasol ol i kristen man tasol i stap. Em baibel em i wanpela bikpela impoten tok save i stap long buk baibel. Em dispela samting em i bilong olgeta Papua Niugini na olgeta hap long wold tu i stap.

Olsem na mipela i no laikim ol man bilong nambis i bagarapim gutnem bilong Hailans. Na sampela ol i no save kolim ples tru bilong man bilong Hailans tasol. Em ol i save tok Simbu. Tasol emmipela i

no bilong Simbu tasol. Em mipela i bilong arapela provins tasol.

Na tu mipela i no save bagarapim nem bilong ol nambisman na mekim tok save long olsem dispela kain pasin em i no gat tru. Em mipela i no save bagarapim nem bilong ol na spoilim ol. Em mipela i no save bagarapim nem bilong ol na spoilim ol. Em i no gut tru. Em tasol liklik wari bilong mi. Em i pinis nau. Tenkyu.

Auta Anana,
Finschhafen/Morobe



NOGAT YAU BILONG HARIM TOK YA

Dia Edita - Nau mi laik toktok liklik tasol long dispela wari. Na dispela wari bilong mi em long insait long Wes Nu Briten Provins.



Sapos sampela man na meri wantaim ol manki i laik i go long sosal nait o pati na sampela man i save spak na kam bagarapim pilai o danis bilong mipela.

Na dispela pasin i no gutpela tumas. Bikos mipela i save lusim mani long baim get o dua long i go insait.

Na pait i save kamap na ol man i save stapim ben long pilai.

Plis na sapos yu wanpela man i stap insait long Wes Nu Briten na yu laik long stretim dispela wari bilong mi, okei, traim na bekim.

Na dispela i go tu long dispela longlong het man i laik kirapim pait long olgeta taim, long ol hap bilong blok.

Michael M. Mass,
Hoskins/WNP



KUNG FU FILM

Dia Edita - Mi wanpela studen long Notre Dame Haiskul. Mi laik autim liklik wari bilong mi em i olsem.

Ol dispela kain muvi ol i save salim long kantri ol i save kolim olsem tarzan kung fu, na ol pamuk kain mi no ting em i stret. Bilong wanem ol yangpela manki ol i save kolim raskel manki ol i save lukim na ol i kain kain samting pasim long tingting bilong ol na ol i save brukim stua na kukim stua na stil nabaut.

Sapos yumi laik sanap strong yumi mas baim ol gutpela kain. Maski long ol rabis nabaut. Mi no laikim dispela kain muvi long olgeta hap bilong PNG. Tenkyu.

Mary Kereki,
Mt. Hagen.

MAMA BAI WARI MOA

Dia Edita - Mi lukim wanpela pasin ol i mekim long Lae maket. Na mi lukim na i no stret long tingting bilong mi.

Long Lae bikpela maket tasol mi painim dispela kranki pasin. Yumi save pinis nem maket, dispela em i bilong kain kain man i stap long ples ol i ken planim kaikai na kisim i go long maket na ol i ken painim liklik toea bilong ol.

Long wanpela holide bilong mipela i kamap na mi i go i stap long Lae na mi i go raun long maket na mi lukim wanpela lapun meri i kisim kaikai i kam putim long maket na em i stap.

Na sampela man i kam na giamanim o trikim em na kisim olgeta kaikai na ol i no givim mani inap long dispela kaikai. Nogat.

Ol i givim 40 toea tasol long dispela lapun. Na kaikai em i kisim i kam em inap long K5 o samting olsem.

Mi lukim dispela pasin na mi sori tru long dispela lapun meri. Sapos yumi stap rabis tru bai yumi mas tingting long mekim wanem na mi i gat mani na mi i stap amamas.

Yumi tingting olsem yumi save i go long taun na yumi wok mani na yumi i gat olgeta samting. Na ol lapun bilong ples ol i save hatwok tru long painim mani bilong ol long helpim ol yet.

Olsem na yumi no ken mekim kain pasin stil olsem long taim yumi i go long maket na baim samting long maket.

Mi laik askim yupela. Dispela pasin stil em i stap long olgeta maket bilong ol narapela provins tu o long Lae tasol.

G.Pita Kamari,
Heldsbach/Morobe Provins

OL I STILIM KAP

(Jenesis 43: 1 - 44: 12)

Jekop i bel nogut i wari planti.

Tasol watpo hetman bilong Isip i pasim Simeon inap em i lukim Bensamin? Em i laik mekim wanem long em?

Mipela i no save. Tasol sapos mi no go, Simeon bai dai... na mipela tu bai dai long hangre... Mi mas go, papa.

Bensamin i tok tru. Orait, yupela i go, Kisim mani i go na kisim sampela presen i go long hetman. Mi pre bai God i lukautim yupela.

Bihain long sampela de ol i kamap long Isip gen.

Yu no ken pret, Bensamin. Mipela sambai long yu na helpim yu.

MI no pret. God bai lukautim mi hia olsem long ples.

Ol i kamap gen long haus bilong hetman na ol i no save em i Josep tasol.

Mipela i pikinini bilong Jekop na mipela i kam bek gen long baim wit. Taim mipela i kamap long ples mipela i bin painim mani insait long ol bek, nau mipela i bringim mani i kam bek.

Masta bilong mi i wetim yupela. Bai em i kam.

Simeon

Bensamin, i gut yu bin kam.

Yes, tasol mi pret yupela i bin lusim ting long mi. Kalabus i kol na tudak na mi pret.

Yu orait?

Maski, Simeon... yu no pret, mipela elevenpela brata i mas wok gut wantaim.

Orait, nau ol brata i kalap nogut long wanem ol i kam insait long wanpela bikpela rum kaikai Josep i wetim ol i stap.

Papa i stap gut?

Yesa, masta.

Na smolbrata bilong yupela em stap we?

Em hia.

Josep i lukim pes bilong Bensamin na em i ting long mama bilong em, em mama i dai taim em i karim Bensamin. Kwiktaim Josep i go ausait i krai.

Em i mekim wanem?

Josep i stap arasait na i krai.

Josep i kam bek insait long rum kaikai tasol em i wok yet long traim ol brata. Tasol ol brata i tingting planti yet...

Dispela man i save tumas long mipela. Em i laik mekim wanem?

Yu lukim, ol i mekim mipela i sindaun bihainim ol yia bilong mipela

Na taim ol i tilim kaikai, ol wokboi i givim ol spesel kaikai samting i go long Bensamin.

Yu lukim?

Maski, i orait.

Bihain ol i kaikai pinis ol brata i baim wit gen na ol i kirap i go bek. I no longtaim sampela hos i kam bihainim ol.

Yupela i stap. Yupela i bin stilim kap bilong masta bilong mi.

Wanem? Mipela nogat. Yupela i ken lukim ol samting bilong mipela.

Sapos mi painim kap long bek bilong wanpela man, em i mas slev long masta bilong mi.

Ofisa i painim kap insait long bek bilong Bensamin..

Em kap ya.

Edited by permission of the David C. Cook Foundation. Copyright 1973, David C. Cook Publishing Co. All rights reserved.

SOMARE LONG YUNAITET NESENS

(i kam long pes 3)

man long Rhodesia. Mipela i bihainim tingting bilong dispela tupela bikpela kantri long helpim Rhodesia long stretim tok. Na mipela i no laik ol i statim pait namel long ol waitman na ol blakman. Mipela i blip olsem, bikpela lain pipel long wanpela kantri i mas bos.

Na long Saut Afrika em i wankain tasol. Mipela Papua Niugini i egens long smolpela lain waitskin hia tu i bosim bikpela lain blakskin moa. Na i no givim vot long ol, long kantri bilong ol yet. Mipela Papua Niugini i tambu long mekim bisnis wantaim Saut Afrika. Na mipela i no laik lukim olsem wanem planti bikpela kantri i bin mekim dispela wankain promis bilong tambuim bisnis wantaim Saut Afrika. Tasol ol i no bin bihainim dispela promis bilong ol - na ol i go mekim bisnis tasol.

Mipela Papua Niugini i no laikim tu dispela pasin

bilong gavman bilong kantri Uganda i mekim nogut tru long ol wanskin bilong en, na i krungutim na kilim na nogutim ol tru. Mipela i laikim dispela Yunaitet Nesens i painim pasin bilong helpim ol tarangu long dispela kantri Uganda.

Atom Bom

Papua Niugini wantaim ol arapela kantri long biksolwara Pasifik i no laikim tru ol kantri i kam pairapim ol bikpela atom bom long hap bilong mipela. Mipela i no laik ol i kam testim ol samting nogut olsem nabaut long ol ailan bilong mipela. Mipela i laikim bai olgeta kantri insait long Yunaitet Nesens i mas tambuim olgeta pasin bilong testim na yusim ol atom bom.

Sapos yu no laik rit, yu wankain olsem wanpela man i no save rit long wanem em i no bin go long skul.

TERRITORY NET SUPPLIES
Box 5860, Boroko, Tel. 25.6700

Namba wan ples bilong baim olkain samting bilong wokim umben: string, rop, twain, let, flot, nil bilong samap.

Rait na askim mipela long prais bilong ol.

ol sios harim OLKAIN KASET TEP

C-45, C-60, C-90, C-120.

Planti Sios na Kristen grup na gavman dipatmen long Australia na Nu Silan i save baim long mipela.

TEP EM I AS TRU BILONG KASET.

Ol i TDK kaset tasol.
Kaset i gat ol liklik skru.
Mipela i gat spea pat bilong fiksिम.

*Rait long kisim spesel prais long Sios o Baibel wok.
Kisim tu wanpela fri kaset olsem eksampel.*

DIRECT IMPORTS (NZ) LIMITED
P.O. Box 72, Hastings
New Zealand



Saut Pasifik Komisin

Moa olsem wan handet deliget bilong olkain kantri long biksolwara Pasifik i bin kibung inap 6-pela de long Pago Pago, em biktaun bilong American Samoa. Dispela miting em i kibung namba 17 bilong Saut Pasifik Komisin.

Hetman bilong ol deliget bilong Papua Niugini, em Mista Ebia Olewale, Minista Bilong Tret na Foren Afes.

Bikpela tok em i go gen long lo bilong bosim solwara. Em dispela i laik bai olgeta kantri i bosim solwara inap long 200 mail

ILEKSEN I PAUL

(i kam long pes 3)

im. Na i no gat kot o i no gat kalabus sapos ol i votim wanpela man.

Long Port Moresby Not Wes Iektoret, Minista bilong Bisnis bipo, em Mista Gavera Rea, i bin go long kot egens long Mista Mahuru Rarua Rarua na i tok ol ofisa bilong bosim ileksen i no bin mekim stret long vot pepa bilong 142 pipel i bin vot long em. Sapos Mista Rea i bin kisim ol dispela vot, em i win. Long wanem, Mista Rarua i bin winim Mista Rea long 25 vot tasol.

Namba wan Jastis, Sir Sydney Frost, i bin tok olsem, ol i mas mekim nupela ileksen gen bilong stretim dispela wari. Mista Rarua Rarua em i hetman bilong biktaun Port Moresby.

longwe long nambis bilong em.

Narapela samting em i bilong mekim go het gut ol rural developmen, em pasin go het bilong ol fama na wok fama na wok didiman. Ol deliget i wari long wanem long planti kantri bilong ol, help i save kam long ausait, tasol ol bosman bilong olkain projek o wok i no save yusim moa ol lokal viles pipel. Em i bikpela samting. Ol i no ken sindaun wetim gavman tasol. Ol yet i mas helpim go het bilong ol.

Ol deliget i laikim tumas dispela aidia bilong statim wanpela rijonal developmen fan bilong ol Saut Pasifik kantri stret. Inap nau Esian Beng na sampela arapela tu i bin givim dinau long ol sampela kantri bilong Pasifik. Tasol ol i pilim, sapos i gat wanpela developmen fan, em i olsem olgeta i putim sampela mani insait na i sambai long helpim wanpela kantri i laik kisim dinau bilong helpim go het wanpela program o projek o wok insait long en.




YUNAITET NESENS RIPOT

(i kam long pes 11)

Long Guam - komiti i wari long bikpela senis i bin kamap long ol pipel. Na em i wari long wanem komiti i no bin kisim wanpela ripot long pasin sindaun namel long ol lokal na ausaitman . . . Na bilong wanem tu long yia 1975 yet, 25 pesen (25%) bilong olgeta famili long Guam i no gat gutpela sindaun?

Taim komiti i bin toktok long Solomon Ailans, Tuvalu, Nu Hebrides, na ol Tras Teritori bilong ol Pasifik Ailan, komiti i no amamas. Long wanem, ripot i no tok tok liklik long pasin bilong ol long ol dispela kantri long skelim wankain ol wok politik na wok bisnis na wok kalsa - bilong ol lokal pipel na bilong ol man bilong kantri i bosim ol.



Wanpela poto long arapela pes na olgeta poto long dispela yet i stori long bikpela miting bilong Saut Pasifik Komisin long biktaun Pago Pago long Samoa.

Long poto antap yu ken lukim hetman bilong makim Papua Niugini, em Minista bilong Tret na Foren Rilesens, em Mista Ebia Olewale.

Em i pasin bilong ol wansolwara long dispela hap, em ol i kolim Polynesia, ol i manmeri tru bilong danis na singsing na wokim bikpela kaikai. Ol i bikpela pipel tru. Ol i save kukim pik long paia, olsem yu Jukim tupela i stap daunbilo.



Olgeta dispela poto i kam long Infomesen Opis.



STRETPELA ROTA

Driman bilong Jon Banyan
"Pilgrim's Progress" in Pidgin.

i gat 104 pes
sais: 51x31 cm.

Salim 75t. i kam wantaim adres na mipela i salim buk i go long yu. Prinim nem kila.

Christian Bookshop
Box 169, Wewak

Christian Bookshop
Box 78, Mt. Hagen



Poto long lephan: Kirap long lephan yumi lukim ol 4-pela treni pailot bilong yumi i skul nau long Sydney, Australia: Martin Linix, Not Solomons Provins; Granger Narara, Milne Bay Provins; Goodnews Michael Zorro, Madang Provins; Namba Wan graun instrakta bilong ol, Paddy Earle; na las tru, Francis Pohonhelan, bilong Manus Provins.

Tupela poto i bilong Australian Information Service na John Tanner i kisim.

Poto daunbilo: Stat long lephan gen yumi lukim: Francis Pohonhelan, Manus Provins; Leslie Kari, Sauten Hailans Provins; Simon Naua, Sentral Provins; Martin Linix, Not Solomons Provins; Goodnews Michael Zorro, Madang Provins; na las tru, Gione Imonzin, bilong Morobe Provins. I gat 11 PNG treni pailot i stadi long kamap pailot long Australia.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.